

Ini Denu Sa Igsulat I Amos

Ini Sa Edungan Kagi I Amos

²Mig-ikagi Amos i, guwaen di, “Petaled umikagi Datù Nemula i kedu diyà sa Getan Siyon, owoy mekeseluh sa kagi di kedu diyà sa menuwa Hélusalém. Kumegangu sa medoo keluwen diyà sa kenà egpetabtab hinagtay, owoy lumegupay ma sa medoo keluwen diyà sa getan Kalmél.”

Ini Sa Kepigtamay I Nemula Diyà Sa Medoo Balangan Tanà Medapag Diyà Islaél

³Na, mig-ikagi Datù Nemula i denu sa tanà Siliya, guwaen di, “Medoo dé gulê sa kebael da salà sa medoo etaw diyà sa menuwa Damasko. Huenan di, endà dé mekepeuloy ku duu sa salà da, dodoo pigtamayan ku kagda. Tigtu egpeli Hayden da sa medoo etaw eg-ugpà diyà sa tanà Galaad.^b ⁴Huenan di, peudanan ku apuy sa metolol dalesan binaelan i Datù Hasawél diyà siedò kutà

406

i Datù Bénadad.^c ⁵Lukaten ku sa pakel sa bengawan diyà sa menuwa Damasko, owoy kedanan ku sa medoo etaw eg-ugpà diyà sa Sugud Aben owoy sa ulu-ulu diyà sa menuwa Bétédén. Mesigkem sa medoo etaw tegeSiliya anì mekeangay da diyà sa tanà Kil. Aken si Datù Nemula sa eg-ikagi ini i.”

⁶Na, mig-ikagi Datù Nemula i denu sa tanà Pilistiya, guwaen di, “Medoo dé gulê sa kebael da salà sa medoo etaw diyà sa menuwa Gasa.^d Huenan di, endà dé mekepeuloy ku duu sa salà da, dodoo pigtamayan ku kagda. Sinigkem da sa langun etaw diyà sa sebaen balangan tanà owoy dinagang da diyà sa medoo tegeIdom anì meudipen da. ⁷Huenan di, peudanan ku apuy sa kutà sa menuwa Gasa anì meulow sa langun kutà di apiya di pa megamel. ⁸Kedanan ku sa medoo ulu-ulu diyà sa menuwa Asdod owoy sa datù diyà sa menuwa Askelon. Pigtamayan ku sa menuwa Ikelon,^e taman sa egoh di meimet mematay sa medoo tegePilistiya nesamà. Aken si Datù Nemula sa eg-ikagi ini i.”

⁹Na, mig-ikagi Datù Nemula i denu sa tanà Tilo, guwaen di, “Medoo dé gulê sa kebael da salà sa medoo etaw tegeTilo. Huenan di, endà dé mekepeuloy ku duu sa salà da, dodoo pigtamayan ku kagda. Sinigkem da sa medoo etaw diyà sa medoo dakel menuwa owoy dinagang da diyà sa medoo tegelIdom anì meudipen da dutu. Owoy endà ma pinangunutan da duu sa nesesapadan binaelan da denu sa keseloyukay. ¹⁰Huenan di, peudanan ku apuy sa kutà sa menuwa Tilo anì meulow sa langun kutà di.”

¹¹Na, mig-ikagi Datù Nemula i denu sa tanà Idom, guwaen di, “Medoo dé gulê sa kebael da salà sa medoo etaw tegelIdom. Huenan di, endà dé mekepeuloy ku duu sa salà da, dodoo pigtamayan ku kagda. Eglohoten da tumigbas sa medoo duma da tegeIslaél^f owoy endà duen sa kehidu da. Endà duen taman sa kebulit da, owoy endà ma egsabuhan da duu. ¹²Huenan di, peudanan ku apuy sa menuwa Timan owoy meulow ma sa medoo kutà sa menuwa Basela.”^g

¹³Na, mig-ikagi Datù Nemula i denu sa tanà Amon, guwaen di, “Medoo dé gulê sa kebael da salà sa medoo etaw tegeAmon. Huenan di, endà dé mekepeuloy ku duu sa salà da, dodoo pigtamayan ku kagda. Egoh da migpengayaw anì kumelabel sa tanà sakupen da, binaelan da sa medoo medaet diyà sa tanà Galaad enù ka iglapeg da sa medoo bayi obol inebuan da sundang sa getek da. ¹⁴Huenan di, peudanan ku apuy sa kutà sa menuwa Laba anì meulow sa medoo kutà di apiya di pa megamel.

^c 1:4 Iya sa duwa datù diyà sa tanà Siliya si Datù Hasawél owoy si Datù Bénadad.

^d 1:6 Sebaen dakel menuwa diyà sa tanà Pilistiya sa menuwa Gasa. ^e 1:8 Iya sa medoo menuwa diyà sa tanà Pilistiya sa menuwa Asdod owoy sa menuwa Askelon owoy sa menuwa Ikelon. ^f 1:11 Iya sa tupù sa medoo tegelIdom si Isaw sa seping i Hakob, owoy si Hakob sa tupù sa medoo tegelIsaél. ^g 1:12 Diyà sa uwang tanà Idom sa menuwa Timan owoy sa menuwa Basela.

Agulê metibos sa medoo kuntelâ da amuk meuma iya wê agdaw da mengayaw lagà kedugsuk sa sepuk neamutan kelamag siling. ¹⁵ Mesigkem sa datù da tegeAmon lapeg sa medoo ulu-ulu da anì mekeangay da mediyù dò. Aken si Datù Nemula sa eg-ikagi ini i.”

2 ¹Na, mig-ikagi Datù Nemula i denu sa tanà Moab, guwaen di, “Medoo dé gulê sa kebael da salà sa medoo etaw tegeMoab. Huenan di, endà dé mekepeuloy ku duu sa salà da, dodoo pigtamayan ku kagda. Apiya sa medoo tuelan sa datù tegeIdom daen, inulow da doo taman sa egoh di nebaluy abuh. ²Huenan di, peudanan ku apuy sa tanà Moab anì meulow sa medoo kutà diyà sa menuwa Keliot. Hê, sa medoo etaw tegeMoab, mematay da danà gila ligò sa medoo sundalu egpetibos owoy eghiyupen da ma sa tegbuli da. ³Imatayan ku sa datù tegeMoab lapeg sa langun salu di. Aken si Datù Nemula sa eg-ikagi ini i.”

Ini Sa Kepigtamay I Nemula Diyà Sa Medoo TegeHuda

⁴Na, mig-ikagi Datù Nemula i, guwaen di, “Medoo dé gulê sa kebael da salà sa medoo tegeHuda. Huenan di, endà dé mekepeuloy ku duu sa salà da, dodoo pigtamayan ku kagda. Pineulan da sa medoo uledin ku owoy endà ma pinangunutan da duu sa igsugù ku. Neakalan da danà sa medoo nemula-mula egpenemulawen sa medoo tupù da egoh anay. ⁵Huenan di, peudanan ku apuy sa tanà Huda anì meulow sa medoo kutà diyà sa menuwa Hêlusalém.”

Ini Sa Kepigtamay I Nemula Diyà Sa Medoo TegeIslaél

⁶Na, mig-ikagi Datù Nemula i, guwaen di, “Medoo dé gulê sa kebael da salà sa medoo etaw tegeIslaél. Huenan di, endà dé mekepeuloy ku duu sa salà da, dodoo pigtamayan ku kagda. Dinagang da sa medoo etaw épê metiengaw adat anì meudipen da danà da daa endà egpekebayad sa utang da. Apiya di pa tukééy daa sa utang da lagà sa sebaen bakiyà daa, dinagang da doo sa medoo pubeli anì meudipen da. ⁷Eg-utuhan da sa medoo etaw endà duen egkegaga lagà daa kepung tanà, owoy endà eggsagipaen da duu sa ketuu sa medoo etaw egkepasangan. Egsumbungen da sa mapulù ngadan ku enù ka duen sa etaw teleanak eg-inumawen lawa da sa sebaen daa bayi. ⁸Apiya diyà sa liyu sa kenà da eggsimbà, igsagpi da doo eghibat sa medoo kawal igsandà sa etaw nekeutang diyà kenagda. Owoy diyà sa dalesan kenà da eggsimbà diyà sa nemula da, eg-inemen da sa wain nekuwa da diyà sa etaw pinesalà da.

⁹“Dodoo taa yu sa binaelan ku diyà sa medoo etaw ku. Pinedaetan ku sa medoo tegeAmoliya egoh sa medoo etaw ku anay migtebow diyà siini tanà. Apiya di pa éhê kehagtaw sa kayu sidelo sa tegeAmoliya owoy lagà da sa ketegas sa kayu ensina, pinedaetan ku doo sa bunga da owoy sa dalid da ma. ¹⁰Linaun ku kiyu kedu diyà sa tanà Igiptu, owoy inuwit ku

ma kiyu mig-ukit diyà sa melabel tanà mediyù dalesan taman epat pulù gepalay anì mekebegay ku diyà keniyu sa tanà sa medoo tegeAmoliya.

¹¹Hinemili ku sa duma anak yu maama anì mebaluy da tegesugkow sa kagi ku, owoy hinemili ku ma sa liyu anak yu maama anì mebaluy da etaw Nasalo.^h O medoo tegeIslaél, netiigan yu doo tuu ini i. Aken si Datù Nemula sa eg-ikagi ini i. ¹²Dodoo pineinem yu wain sa etaw Nasalo anì meketipay da sa uledin ku, owoy hinawidan yu ma sa medoo tegesugkow kagi ku anì endà tumulon da sa igpeikagi ku.

¹³“Huenan di, tuméen ku dé kiyu, lagà sa kalitun nekelebeng diyà tanà danà di mebegat sa lulan di éhê palay. ¹⁴Apiya di pa sa metéél lumetu, endà doo mekepelaguy di, owoy mekedanan ma bagel sa medoo mebekal. Apiya sa sundalu, endà doo mealukan di duu sa hagdi munoy lawa. ¹⁵Apiya sa metagleng egpanà, mekeesud-esud doo. Apiya sa metéél egletu, endà ma doo mekepelaguy di, owoy apiya sa etaw migkudà, endà ma doo mekelesò di. ¹⁶Asal meuma iya wé agdaw, apiya sa tigtu mebalaw sundalu, metantang sa kinemkem di amuk melaguy. Aken si Datù Nemula sa eg-ikagi ini i.”

3 ¹Na, o medoo tegesIslaél, dinegdineg yu siini kagi tinulon i Datù Nemula denu keniyu i langun etaw linaun di kedu diyà sa tanà Igiptu. ²Guwaen di, “Na, kiyu daa sa etaw hinemili ku diyà sa langun balangan etaw diyà siini sinukub langit. Huenan di, pigtamayan ku doo kiyu danà sa medoo salà yu.”

Ini Denu Sa Galebek Sa Tegesugkow Sa Kagi I Nemula

³Na, endà meseunut sa duwa etaw mipanaw amuk endà muna da neseenggat. ⁴Endà uminigel sa liyun diyà sa ketalunan amuk endà duen sa hemueden di hinaa di. Owoy endà ma uminigel sa anak liyun diyà sa kenà di liyu daa amuk egdaes. ⁵Endà gapenen litag sa manuk ketalunan amuk endà duen sa epan di. Owoy endà ma mepekas sa litag amuk endà duen sa mekas. ⁶Melimedangan doo sa medoo etaw amuk dinegen da sa tegbuli diyà sa menuwa da enù ka iya sa tandà di dumuen sa gila. Endà duen sa mekepesu mebaelan diyà sa sebaen menuwa liyu daa amuk beken si Datù Nemula sa migbael.

⁷Tuu ma doo, endà duen sa egbaelan i Datù Nemula amuk endà muna di duu ipetiig diyà sa medoo etaw di atung tegesugkow sa kagi di.

⁸Mig-inigel dé sa liyun, huenan di nelimedangan sa langun etaw. Na, mig-ikagi dé Datù Nemula i, huenan di endà mebaluy di amuk umeked sa etaw sumugkow sa kagi di.

^h 2:11 Sa etaw Nasalo, migpasad da diyà si Nemula sa egoh da endà uminem sa wain ataw ka sa liyu mekehilu owoy endà ma pegunting da owoy endà ma umamis da sa nematay. Basa ko ma diyà sa libelu Kebilang 6:1-8 denu sa adat sa etaw Nasalo.

Ini Denu Sa Kepigtamay I Nemula Diyà Sa Menuwa Samaliya

⁹Na, mig-ikagi Nemula i diyà sa tegesugkow sa kagi di, guwaen di, “Ikagiya ko sa medoo ulu-ulu diyà sa menuwa Asdodⁱ owoy diyà sa tanà Igipitu anì mesetipon da dutu siedò getan-getan nekeulingut diyà sa menuwa Samaliya anì sugpayalen da sa dakel keseginaluway owoy sa medoo balangan medaet binaelan etaw dahiya.”

¹⁰Mig-ikagi Datù Nemula i, guwaen di, “Endà netiigan siini medoo etaw duu sa mepion egbaelan da. Nepenù sa medoo dalesan da sa medoo langun taman linampas da. ¹¹Huenan di, seulingutan sa medoo kuntelà da sa tanà da. Gubalen da ma sa medoo kutà diyà sa menuwa da, owoy lampasen da ma sa medoo langun taman diyà sa medoo dalesan da. Aken si Datù Nemula sa eg-ikagi ini i.”

¹²Ini sa kagi i Datù Nemula, guwaen di, “Amuk umaluk hedem sa tegeipat kebilibili sa kebilibili di hinemued sa liyun, iya daen sa nepeka di sa duwa lisen owoy sa telinga di. Hediya ma, mealukan doo sa medoo tegeIslaél eg-ugpà diyà Samaliya, dodoo iya daen sa mekuwa da sa lisen bangkù owoy sa bekut kamah daa.”^j

¹³Mig-ikagi Datù Nemula i, sa Nemula épê dakel egkegaga, guwaen di diyà kenak, “Dinegdineg ko ini i, owoy sasai ko diyà sa medoo tugod i Hakob. ¹⁴Amuk meuma sa agdaw egoh ku migtamay sa medoo tegeIslaél danà sa salà da, pedaetan ku sa medoo atung kenà da eg-ulow sa ibegay da diyà sa egpenemulawen da diyà sa menuwa Bétél. Apiya sa éhê palas sidung diyà sa epat pisuk sa kenà da eg-ulow sa igbegay da, metepù doo owoy menabù ma diyà tanà.^k ¹⁵Gubalen ku sa medoo dalesan atung kenà da mugpà amuk sasang megenaw owoy sa medoo dalesan atung kenà da mugpà amuk sasang meedup. Gubalen ku ma sa medoo metolol dalesan da, owoy anan medaetan sa medoo dakel dalesan da. Aken si Datù Nemula eg-ikagi ini i.”

4 ¹Na, kiyu i medoo bayi tegeSamaliya, dinegdineg yu ini i. Migkegebù yu dé lagà sa medoo sapì diyà sa tanà Basan migkegebù danà di mepion sa keipat. Egpeumàumaan yu sa medoo etaw endà duen negaga owoy egpelihayen yu ma sa medoo etaw pubeli, agulé egsuguen yu ma sa sawa yu anì uwitan da kiyu sa wain inemen yu. ²Na, migpasad Datù Nemula i danà di metiengaw, guwaen di, “Meuma doo sa agdaw egoh yu mepigtamayan. Sanggatan da kiyu kodot mekeiling sa sedà

ⁱ 3:9 Dakel menuwa diyà sa tanà Pilistiya sa menuwa Asdod. ^j 3:12 Mebaluy ma iya sa kagi di, “Hediya ma tukééy daa sa mealukan diyà sa medoo tegeSamaliya eghibat diyà sa metaes bangkù.” ^k 3:14 Diyà sa 1 Medoo Datù 1:50; owoy 2:28, amuk duen sa etaw egtipuwen da, mebaluy mangay sumabà diyà sa éhê palas sidung diyà sa pisuk kenà da eg-ulow sa igbegay da diyà si Nemula anì endà mekesulì sa kuntelà di. Dodoo amuk metepù iya wé, endà dé duen sa kenà etaw umaput.

ginapen duli, owoy agaken da kiyu langun. ³Agaken da kiyu umukit diyà sa kenà di tinosongon da kutà negubal medapag diyà sa tapay kenà yu, owoy hemagawan da ma kiyu umukit diyà sa getan Halmon.¹ Aken si Datù Nemula eg-ikagi ini i.”

Ini Denu Sa Medoo TegeIslaél Endà Migpangunut Diyà Si Nemula

⁴Na, mig-ikagi Datù Nemula i, guwaen di, “O medoo tegeIslaél, meiyap yu mangay sumimbà dutu menuwa Bétél dò, dodoo mael yu polo salà. Meiyap yu ma mangay sumimbà dutu Gilgal dò,^m dodoo muman yu polo mael medaet. Mesalà yu doo apiya di pa uwiten yu sa medoo hinagtay sa ibegay yu atang imatayan uman magtu simag, owoy mesalà yu ma doo apiya di pa uwiten yu sa sepulù pelesintu sa ibegay yu uman meuma telu agdaw. ⁵Mesalà yu doo apiya di pa megay yu sa epan tandà sa kepesalamat yu diyà si Nemula. Owoy meiyap yu ma peolòlò denu sa medoo liyu ibegay yu legkang diyà sa pedu yu, enù ka iya sa adat yu ubòubò yu sumimbà, kiyu i medoo tegeIslaél.

⁶“Na, apiya di pa duen sa dakel bitil pineangay ku diyà sa langun menuwa yu, tapay yu doo endà migpelikù diyà kenak. Aken si Datù Nemula sa eg-ikagi ini i.

⁷“Endà ma pineudan ku duu egoh di sasang kelomò sa hinemulaan yu, huenan di nedaetan sa langun hinemula yu. Pineudan ku diyà sa sebaen menuwa, dodoo endà eg-udan di diyà sa liyu menuwa. Eg-udan doo diyà sa sebaen hinemulaan dodoo melaeb polo sa liyu hinemulaan. ⁸Danà da eglupahan, egdunggèldunggél sa medoo etaw kedu diyà sa duwa ataw ka telu gemenuwa eg-angay egpengaa't wayeg diyà sa sebaen ma menuwa, dodoo tapay doo endà nekedan sa lupah da. Gasama iya, tapay yu doo endà egpelikù diyà kenak. Aken si Datù Nemula sa eg-ikagi ini i.

⁹“Pinedaetan ku sa medoo hinemulaan yu danà sa meedup kelamag owoy inesil ma. Kinaen kasuk sa medoo liyu hinemula yu owoy sa medoo palas, lapeg ma sa medoo kayu pigus owoy kayu olibu. Dodoo tapay yu doo endà egpelikù diyà kenak. Aken si Datù Nemula sa eg-ikagi ini i.

¹⁰“Pineangay ku ma diyà keniyu sa tigtu dakel linadu iling sa binaelan ku diyà sa tanà Igiptu egoh anay. Igpeimatay ku sa medoo melaud yu danà gila owoy igpelampas ku ma sa medoo kudà yu. Buyu yu dé endà egpekeginawa danà sa medoo nematay egkemahù diyà sa kenà yu. Dodoo tapay yu doo endà egpelikù diyà kenak. Aken si Datù Nemula sa eg-ikagi ini i.

¹¹“Pinedaetan ku sa duma menuwa diyà keniyu iling sa egoh ku migpedaet sa menuwa Sodoma owoy menuwa Gomola egoh anay. Dodoo

¹ 4:3 Dutu tanà Basan dò sa getan Halmon. ^m 4:4 Duen sa mapulù simbaan sa medoo tegeIslaél diyà sa menuwa Bétél owoy menuwa Gilgal.

nealukan doo sa duma yu lagà sa tinelisì eglegleg linaun ku kedu diyà sa apuy. Gasama iya, tapay yu doo endà egpelikù diyà kenak. Aken si Datù Nemula sa eg-ikagi ini i.

¹² “Huenan di, o medoo tegeIslaél, tigtu pigtamayan ku doo kiyu. Owoy danà ku mael iya wé, ingati yu dé sa egoh yu tumaeng diyà si Nemula, sa Nemula yu.”

¹³ Si Nemula sa migpeduen sa medoo tuduk owoy sa migbael sa kelamag.

Kagdi ma sa egpetiig sa penemdem di diyà sa etaw,
owoy kagdi ma doo sa migbaluy sigep sa agdaw.

Kagdi sa datù egsabà siini sinukub langit.”

Iya sa ngadan di si Datù Nemula sa épê dakel egkegaga.

Ini Sa Sasà Di Diyà Sa Medoo TegeIslaél Anì Mesenulê Da

5 ¹Na, o medoo tegeIslaél, dinegdineg yu siini kagi ku egdelawit diyà keniyu. ²Guwaen ku,

“Lagà sa kenogon endà dé sumawa sa medoo tegeIslaél.

Netuwal da owoy endà dé mekeenaw da.

Mekepandayà da nekeliyang diyà sa hagda tanà,

owoy endà dé duen sa tumabang kenagda petigdeg.”

³Na, ini sa kagi i Datù Nemula, guwaen di, “Amuk sa sengibu sundalu diyà sa sebaen menuwa sa egsuguen yu mangay gumila, magatus daen sa mekepelikù. Owoy amuk sa magatus sundalu diyà sa liyu menuwa sa egsuguen yu mangay gumila, sepulù daen sa mekepelikù.”

⁴Na, mig-ikagi Datù Nemula i, guwaen di, “O medoo tegeIslaél, pelikù yu diyà kenak anì kumelalù yu. ⁵Yoko dé eg-angay ya egsimbà dutu Bilsiba dò. Owoy yoko egpetabang kenak dutu Bétél dò enù ka medaetan iya wé menuwa. Yoko ma eg-angay ya dutu Gilgal dò enù ka mesigkem sa medoo etaw di anì meuwit da dutu mediyù dò.”

⁶Na, kiyu i medoo tegeIslaél, pedapag yu dé diyà si Datù Nemula anì kumelalù yu. Dodoo amuk umeked yu, umukit Nemula i diyà sa tanà Islaél^a lagà sa dakel apuy egdelakab. Meulow sa medoo etaw diyà sa menuwa Bétél, owoy endà duen sa mekepadeng iya wé apuy. ⁷Mekehiduhidu yu, kiyu i medoo etaw egkesuwì keantang owoy kiyu i etaw endà egtampil diyà sa etaw épê ketuu.

⁸Na, si Datù Nemula sa migpeduen sa medoo bituen, lapeg sa bituen telu^p amuk sasang keohok owoy amuk sasang keketu. Kagdi ma sa migpeteleséng sa agdaw owoy sa migbaluy sigep sa agdaw. Kagdi sa

^a 4:13 Mebaluy ma iya sa kagi di, guwaen di, “Kagdi sa umutuh diyà sa medoo mehagtaw tutuk diyà tanà.” ^o 5:6 Iya sa kagi Hibelu, guwaen di, “diyà sa medoo tugod i Hosé.”

^p 5:8 Iya ma sa kepengadan sa bituen telu sa Pléyadis owoy sa Olion.

migtipon sa wayeg kedu diyà dagat owoy buwahren di dema diyà tanà amuk eg-udan. Iya sa ngadan di si Datù Nemula. ⁹Lagà silà sa kepigtamay di sa medoo etaw épê egkegaga, owoy pedaetan di ma sa medoo kutà da apiya di pa megamel.

¹⁰Na, kiyu i medoo tegeIslaél, egkelepuhan yu sa etaw egsigbolow diyà sa etaw lampawì, owoy egpeumàumaan yu ma sa etaw eg-ikagi sa tuu diyà sa tegeantang. ¹¹⁻¹²Netiigan ku kedoo sa salà yu owoy sa kedaet sa binaelan yu. Eg-utuhan yu sa medoo etaw pubeli, owoy egtepelen yu ma sa kinetu da. Egpelelihayen yu sa medoo etaw endà duen salà danà di eglimunan yu pilak sa ketuu da, owoy igpesekê yu ma ketuu sa etaw pubeli amuk eg-antang yu. Huenan di, endà mekeugpà yu diyà sa metolol dalesan binaelan yu, owoy endà ma mekeinem yu sa wain nekuwa diyà sa palas hinemula yu. ¹³Dodoo sa etaw épê keketiig, egpetemed da daa enù ka anan medaet sa egkebaelan ini egoh di.

¹⁴Na, udesi yu baeli sa mepion owoy iwod yu sa medaet anì kumelalù yu. Amuk hediya, tigtu umunut-unut diyà keniyu Datù Nemula i épê dakel egkegaga, nekeiling sa inikagi yu. ¹⁵Kelepuhi yu sa medaet, dodoo pedakel yu diyà sa pedu yu sa mepion. Pelumani yu sa ukit keantang yu anì mehàa sa ketuu. Amuk hediya, petow ki daa mehiduwan i Datù Nemula épê dakel egkegaga sa medoo etaw di tegeIslaél nesamà.

¹⁶Huenan di, ini sa kagi i Datù Nemula sa Nemula épê dakel egkegaga, guwaen di, “Dumuen sa medoo etaw lumengat diyà sa medoo dalan diyà siini menuwa owoy suminegaw da ma. Apiya sa medoo tegehemula, meenggat da anì meseunut da dumelawit sa medoo atung tegedelawit egsukayan. ¹⁷Dumuen ma sa medoo dumelawit diyà sa langun kenà hinemulaan palas. Iya sa baelan da enù ka angayen ku kiyu migtamay. Aken si Datù Nemula sa eg-ikagi ini i.”

Ini Sa Egoh Di Endà Nesugat Sa Kesimbà Da

¹⁸Mekehiduhidu yu, kiyu i medoo etaw eg-angat-angat sa agdaw i Datù Nemula. Maen di ya eg-angat-angatan yu iya wé agdaw? Endà duen sa mepion mekebegay diyà keniyu amuk meuma iya wé agdaw, enù ka iya sa agdaw deleman, beken agdaw legdaw. ¹⁹Amuk meuma iya wé agdaw, lagà yu sa etaw egpelaguy eglohoten liyun, dodoo nesiegungan di polo sa oso. Owoy lagà yu ma sa etaw eglikù diyà sa dalesan di, dodoo egoh di egsabà dé diyà sa kelatkat, hinemued polo sa uled. ²⁰Tuu ma doo, sa agdaw i Datù Nemula, iya sa agdaw deleman, beken sa agdaw legdaw. Iya sa agdaw kepigtamay, beken sa agdaw kealuk.

²¹Mig-ikagi Datù Nemula i, guwaen di, “Egkelepuhan ku sa kepista yu enù ka ubòubò yu daa egsimbà, owoy endà ma egketuuwan a diyà sa kesetiponoy yu egsimbà. ²²Apiya di pa uwitan yu aken sa ibegay yu uloy atang ulowen owoy sa medoo igbegay yu kaenen, endà doo metuuwan a

dahiya. Owoy endà ma sagipaen ku duu sa medoo hinagtay yu megebù sa uwiten yu diyà kenak uman meuma sa pista sa kepesalamat yu. ²³ Sabuhi yu dé sa metaled keduyuy yu egsimbà. Endà ma dé egkeiyapan ku duu egdinegdineg sa medoo dalemetan yu. ²⁴ Dodoo baeli yu polo sa tuu keantang diyà sa duma yu lagà sa kedelug sa lawa't wayeg. Owoy baeli yu ma sa metudà adat lagà sa lawa't wayeg endà meeti di.

²⁵ “O medoo tegeIslaél, egoh yu dutu siedò melabel tanà mediyù dalesan taman epat pulù gepalay, endà tegelen ku duu sa kebegay yu sa medoo hinagtay sinumbali yu owoy sa medoo liyu igbegay yu ma atang kepesalamat. ²⁶ Dodoo ini egoh di egpenemulawen yu polo sa medoo inetaw binaelan yu danà sa niyu daa penemdem. Egpenemulawen yu si Sakut sa inetaw egdatuen yu owoy si Kaiwan sa inetaw éhê palas bituen. Na, danà yu egpenemula iya wé, huenan di uwit yu doo siedò medoo inetaw yu ²⁷ amuk meuma sa egoh ku pesigkem keniyu mekeangay diyà sa dibaluy sa menuwa Damasko.” Iya sa kagi i Datù Nemula épê dakel egkegaga.

Ini Denu Sa Egoh Sa Tanà Islaél Medaetan

6 ¹ Na, mekehiduhidu yu, kiyu i medoo etaw melanih keugpà diyà sa menuwa Siyon. Iya sa penemdem yu guwaen yu dò endà mekeuma sa medaet diyà sa getan Samaliya, enù ka kiyu sa medoo ulu-ulu diyà sa tanà Islaél épê dakel egkegaga sa atung eg-angayan sa medoo etaw egpetabang. ² Angay yu telow sa menuwa Kalné. Agulé lagbasi yu ma angay telow sa dakel menuwa Hamat, owoy lagbas yu ma angay Gat dò sa menuwa sa medoo tegePilistiya. Endà mekelowon sa niyu egkegaga diyà sa hagda egkegaga, dodoo nedaetan da doo. ³ Iya sa ungayà yu hedem kumelugay pelà sa ketebow siedò agdaw yu mepigtamayan. Dodoo danà sa medoo medaet binaelan yu polo sa pesuwan di metéél tumbow iya wé agdaw.

⁴ Mekehiduhidu yu, kiyu i medoo kawasà etaw eghibat diyà sa metolol kateli owoy egsandaysanday ma diyà sa metaes bangkù ligò yu egkaen sa kaleni nati sapi owoy sa kaleni nati kebilibili. ⁵ Egkeiyap yu egbael sa magtu duyuy lagà sa binaelan i Datù Dabid egoh anay, owoy egduyuy yu ma ligò yu egpedagi sa dalemetan alpa. ⁶ Egtemù yu eg-inem sa wain owoy eglulow yu ma sa lana ipepion ngadeg, dodoo endà egkebukul yu danà sa medoo tugod i Islaél^q mepigtamayan. ⁷ Huenan di, kiyu sa muna mesigkem mekeangay dutu mediyù dò. Agulé mesabuhan sa medoo kepista yu owoy sa kekeanggan yu.

⁸ Na, migpengibet Datù Nemula i épê dakel egkegaga, guwaen di, “Egkelepuhan ku sa kepedakeldakel sa medoo tegeIslaél, owoy endà ma

^q 6:6 Iya sa kagi Hibelu, guwaen di, “sa medoo tugod i Hosé.”

egkeiyapan ku duu sa medoo metolol dalesan da. Huenan di, ipetepel ku diyà sa medoo kuntelà da sa dakel menuwa da lapeg sa medoo langun taman da.”

⁹Na, amuk duen sa sepulù etaw nesamà diyà sa sebaen dalesan, meimet da doo mematay. ¹⁰Agulé tumbow sa duma telahadi di sa atung umulow sa nematay enù ka angayen di sa lawa di. Hê, umowen di sa muni dé etaw diyà sa dalesan, guwaen di, “Duen pa sa duma ko dahini?” Hê, sumagbi sa etaw, guwaen di, “Endà duen di.” Agulé umikagi dema sa duma sa nematay, guwaen di, “Yaka dé egséléken na. Tumulik ki anì endà medowit ta duu sa ngadan i Datù Nemula.”^r ¹¹Taa yu, hih. Amuk si Datù Nemula sa sumugù, megubal sa medoo dakel dalesan owoy melupet ma sa medoo diisek dalesan.

¹²Na, endà lumetu sa medoo kudà diyà sa kebatuwan, owoy endà ma mebaluy di idadu etaw sa sapi diyà dagat. Dodoo binaluy yu mekehilu sa nesugat keantang, owoy igpesekê yu ma sa metudà adat. ¹³Endà mepion sa kepeolòlò yu denu sa egoh yu neketepel sa menuwa Lodiba. Eg-ikagi yu, guwaen yu, “Mebagel ki doo enù ka tinepel ta sa menuwa Kalnim danà sa nita daa egkegaga.”^s

¹⁴Dodoo ini sa kagi i Datù Nemula épê dakel egkegaga, guwaen di, “O medoo tegeIslaél, suguen ku sa medoo etaw kedu diyà sa sebaen ma balangan tanà anì pengayawen da kiyu. Agulé pelihayen da kiyu diyà sa tanà yu kedu diyà sa dalan Hamat denu belabagan taman diyà sa lawa't wayeg Alaba denu kimataan.”

Ini Sa Nehauwan I Amos Denu Sa Medoo Kasuk

7 ¹Na, duen sa nehauwan ku igpehaa i Datù Nemula diyà kenak. Hê, hinaa ku Nemula i egsetipon sa segelugba kasuk egoh di ubus dé kinumpay sa mepion keluwen baed sa datù owoy eglobung dema sa medoo pesu di. ²Hinaa ku ma sa egoh sa medoo kasuk migkaen sa langun keluwen diyà tanà. Agulé mig-ikagi a, guwaen ku, “O Datù Nemula, peuloyi ko sa medoo etaw ko tugod i Islaél. Amuk endà mesenulê ka, endà dé mehagtay da, enù ka endà mebagel da owoy tukééy da ma daen.”

³Huenan di, nepelumanan sa penemdem i Datù Nemula, owoy mig-ikagi, guwaen di, “Endà mebaelan ini i hinaa ko.”

^r **6:10** Endà netumàmaan sa pesuwan da meked umikagi sa ngadan i Nemula. Iya sa penemdem da kéen amuk ikagiyen da sa ngadan i Datù Nemula dumuen sa uman pa medaet mekeuma diyà kenagda. ^s **6:13** Lodiba owoy Kalnim sa duwa menuwa tinepel i Datù Héloboam. Diyà sa kagi Hibelu, iya sa selepangan sa kagi Lodiba endà duen di, owoy iya sa selepangan sa kagi Kalnim sa duwa sidung. Amuk sidung sa tandà sa egkegaga, egpeolòlò da danà sa egkegaga da dodoo lagà endà duen di.

Ini Sa Nehauwan I Amos Denu Sa Apuy

⁴Na, duen dema sa nehauwan ku igpehaa i Datù Nemula diyà kenak. Hê, hinaa ku Nemula i egtapayen di sa dakel apuy atang ipigtamay di sa medoo etaw di. Hê, neeti sa dagat danà di kinaen apuy owoy neulow ma sa tanà. ⁵Agulé mig-ikagi a, guwaen ku, “O Datù Nemula, egpehiduhidu a diyà keniko padeng ko iya wé. Amuk endà mesenulê ka, endà dé mehagtay sa medoo etaw ko tugod i Islaél, enù ka endà mebagel da owoy tukéey da ma daen.”

⁶Huenan di, nepelumanan dema sa penemdem i Datù Nemula owoy mig-ikagi, guwaen di, “Endà meketuu ini i.”

Ini Sa Nehauwan I Amos Denu Sa Tuntun

⁷Na, duen dema sa nehauwan ku igpehaa di diyà kenak. Hê, hinaa ku Datù Nemula i egtigdeg medapag diyà sa kutà owoy migsabà tuntun, enù ka miggamit da tuntun egoh da migbael sa kutà. ⁸Inigsaan di aken, guwaen di, “O Amos, ngadan sa eghauwen ko?”

Hê, migsagbi a, guwaen ku, “Tuntun.”

Agulé mig-ikagi dema Datù Nemula i, guwaen di, “Taa ko, eggamiten ku siini tuntun anì mehaa sa egoh di nekeamu sa medoo etaw ku tegeIslaél, lagà sa sebaen kutà endà nekeunut di diyà sa tuntun. Endà dé mepelumanan sa penemdem ku migtamay kenagda. ⁹Medaetan sa medoo kenà da egsimbà sa medoo tugod i Isak, owoy megubal ma sa medoo mapulù simbaan diyà sa tanà Islaél. Ipeimatay ku ma imet danà sundang sa medoo tugod i Datù Héloboam.”

Ini Denu Si Amos Owoy Si Amasiyas

¹⁰Na, si Amasiyas sa tegesimbà diyà sa menuwa Bétél. Migpeuwit kagi diyà si Datù Héloboam tegeIslaél, guwaen di, “Duen sa penemdem i Amos mael medaet diyà keniko diyà siini tanà Islaél. Medaetan sa kedatuan ko danà sa medoo inikagi di. ¹¹Ini sa kagi i Amos, mematay gaa Datù Héloboam i danà gila, owoy mesigkem ma gaa sa medoo tegeIslaél anì mekeangay da diyà sa sebaen ma tanà.”

¹²Agulé mig-ikagi Amasiyas i diyà kenak, guwaen di, “O Amos, enget dé sa ketulon ko, o tegesugkow kagi i Nemula. Likù ka dé angay tanà Huda dò, owoy pengaa ka sa kehagtayan ko dutu danà sa keantap ko. ¹³Yaka dé egtulon sa antap ko diyà siini menuwa Bétél, enù ka ini sa menuwa kenà sa datù egsimbà diyà sa mapulù simbaan sa medoo tegeIslaél.”^t

^t 7:13 Basa ko sa 1 Medoo Datù 12:26-33 denu sa egoh sa datù tegeIslaél migtenà sa inetaw egpenemulawen da diyà sa menuwa Bétél

¹⁴Agulé migsagbì a diyà kenagdi, guwaen ku, “Beken aken sa tegesugkow kagi i Nemula sa egsukayan amuk eg-antap. Dodoo aken polo sa tegeipat sa medoo hinagtay owoy sa tegeupion sa medoo kayu pigus. ¹⁵Dodoo kinuwa i Datù Nemula aken kedu diyà sa galebek ku tegeipat hinagtay, owoy sinugù di ma aken anì isugkow ku sa kagi di diyà sa medoo etaw di tegeIslaél. ¹⁶Na, dinegdineg ko sa kagi i Datù Nemula. Egpesabuhen ko hedem aken egsugkow sa kagi di, owoy egpesabuhen ko ma hedem aken egtegudon denu sa mebaelan sa medoo tegeIslaél tugod i Isak. ¹⁷Huenan di, o Amasiyas, ini sa kagi i Datù Nemula denu keniko. Meimatayan sa medoo anak ko danà gila owoy mesebaedbaed ma sa tanà ko diyà sa medoo liyu etaw. Mebaluy tegepediyangdang sa sawa ko diyà siini menuwa, owoy kuna, mematay ka doo dutu siedò tanà sa medoo etaw beken tegeIslaél. Mesigkem ma doo sa medoo tegeIslaél anì mekeangay da diyà sa sebaen ma tanà mediyù kedu diyà sa hagda tanà.”

Ini Sa Nehauwan I Amos Denu Sa Baskit Nepenù Sa Melegà Bunga Kayu

8 ¹Na, duen dema sa nehauwan ku igpehaa i Datù Nemula diyà kenak. Hê, hinaa ku sa sebaen baskit nepenù sa melegà bunga't kayu hinemula. ²Agulé mig-igsà Datù Nemula i, guwaen di, “O Amos, ngadan sa egbauwen ko?”

Migsagbì a, guwaen ku, “Sebaen baskit nepenù sa medoo melegà bunga't kayu.”

Agulé mig-ikagi Datù Nemula i diyà kenak, guwaen di, “Neuma dé sa ketamanan” sa medoo etaw ku tegeIslaél. Endà dé mepelumanan sa penemdem ku migtamay kenagda. ³Amuk meuma iya wé agdaw, mebaluy dumelawit polo sa medoo bayi tegeduyuy diyà sa metolol dalesan sa datù.” Dumuen sa medoo nematay meketukid diyà sa langun menuwa, huenan di egpetemedtemed sa medoo etaw.”^w

Ini Denu Sa Kepigtamay I Nemula Diyà Sa Medoo TegeIslaél

⁴Na, dinegdineg yu ini i, kiyu i etaw tegeumémê sa medoo etaw endà duen negaga owoy kiyu i egkelukuy ma egkedan sa etaw pubeli diyà sa tanà yu. ⁵Iya sa penemdem yu, guwaen yu, “Endà dé mekeangat-angat ké sa egoh di meelut sa mapulù agdaw anì mekedagang ké dema sa teligo. Ungayà ké medelamet meelut sa Agdaw Keetud anì mekedagang ké dema. Agulé pilagaen ké sa lagà di, owoy gamiten ké sa asadan endà mepion, owoy pedulian ké sa timbangan anì melugi sa medoo etaw meli.

^u **8:2** Diyà sa kagi Hibelu, buyu nesetepeng sa godoy sa kagi “bunga” owoy sa kagi “ketamanan”. ^v **8:3** Mebaluy ma guwaen di, “dumelawit polo sa medoo bayi tegeduyuy diyà sa simbaan.” ^w **8:3** Mebaluy ma guwaen di, “egpetemedtemed sa medoo etaw egoh da muung sa nematay.”

⁶Pilagaen ké sa kedagang ké sa medoo teligo endà iseg di mepion. Owoy beliyen ké ma sa etaw pubeli anì meudipen danà di endà mekebayad sa utang di, apiya di pa tukééy daa sa utang di éhê lagà sa sebaen bakiyà.”

⁷Na, migpengibet Datù Nemula i sa egpedakelen sa medoo tegeIslaél, guwaen di, “Endà dé melipengan ku duu sa medoo medaet binaelan da.

⁸Huenan di, pelinugen ku sa tanà, owoy suminegaw ma sa langun etaw eg-ugpà diyà tanà. Mekayung sa uwang tanà, hê mulul owoy melenà lagà sa lawa't wayeg Nilo amuk sigel sumenok owoy metigok.

⁹“Amuk meuma iya wé agdaw, pesalepen ku sa agdaw apiya di pa mekebugsang pelawà, owoy pedelemanen ku sa uwang tanà apiya di pa agdaw pelawà. Aken si Datù Nemula sa eg-ikagi ini i. ¹⁰Baluyen ku agdaw kekebukul sa agdaw kekeanggan yu, owoy mebaluy kedelawit polo sa duyuy yu egkeanggan. Pekegalen ku kiyu sa binekas sakù owoy ipeul-ul ku ma sa balut ulu yu, enù ka mekeiling yu sa etaw egdelawit danà di nematay sa anak di bugtung. Iya sa mebaelan yu enù ka tigtu kelikutan temù iya wé agdaw.

¹¹“Mekeuma doo sa agdaw sa egoh di pebitilen ku sa medoo etaw diyà sa uwang tanà. Meketues da, dodoo beken tigtu kaenen sa kenà da meketues. Melupahan da ma dodoo beken wayeg sa pesuwan da eglupahan. Dodoo bitilen da polo sa kedineg da sa kagi i Nemula. Aken si Datù Nemula eg-ikagi ini i. ¹²Dumunggéldunggél da mipanaw kedu tebowon agdaw mangay diyà eledan, owoy kedu kimataan mangay diyà belabagan, enù ka pengauwen da hedem sa kagi i Datù Nemula diyà siini uwang tanà. Dodoo endà mehàa da duu. ¹³Amuk meuma iya wé agdaw, apiya di pa mebagel sa medoo kenogon owoy sa medoo melaud, meendaan da doo tuleng danà da tigtu melupahan. ¹⁴Na, sa medoo etaw egpengibet danà da egسالig diyà sa medoo inetaw diyà Samaliya, eg-ikagi da, guwaen da, ‘Danà sa egpenemulawen diyà Dan,’ ataw ka ‘Danà sa egpenemulawen diyà Bilsiba.’ Dodoo metuwal da doo owoy endà dé mekeenaw da.”

Ini Sa Egoh Di Tigtu Medaetan Sa Medoo TegeIslaél

9 ¹Na, duen sa nehauwan ku kenà ku mighaa si Datù Nemula egtigdeg diyà sa dapag sa atung kenà da eg-ulow sa igbegay da diyà kenagdi. Hê, igsugù di, guwaen di, “Tagpi ko sa pulu sa medoo bugsud sa Dalesan i Nemula anì lumanuhen sa kenà da pinetigdeg owoy anì megubal da owoy menabù da diyà sa ulu sa langun etaw egkesetipon. Amuk duen etaw mesamà endà mematay danà iya wé, meimatayan da doo danà gila. Endà duen sa mekepelaguy owoy endà ma duen sa sebaen mekelesò.

²Apiya di pa kumali da umangay bayà dò anì lidungan da aken hedem, tapay doo launen ku kagda kedu dutu. Owoy apiya di pa kumagbul da umangay langit dò, hugdusen ku doo kagda. ³Apiya di pa lumidung da

diyà sa pulu tuduk Kalmél, pengauwen ku doo kagda owoy sigkemen ku ma. Owoy apiya di pa lumidung da diyà sa kedaleman dagat, isugù ku doo kagda ipehemued sa dakel uled dagat. ⁴Apiya di pa sigkemen sa medoo kuntelà da kagda anì mekeangay da mediyù dò, tapay doo isugù ku kagda ipetigbas sundang. Iya sa penemdem ku diyà kenagda sa egoh da meimatayan, beken duu sa egoh da metabangan.”

⁵Na, si Datù Nemula épê dakel egkegaga, apiya di pa amisen di daa sa tanà, mekayung doo. Mulul sa uwang tanà owoy melenà ma lagà sa lawa't wayeg Nilo amuk sigel sumenok owoy metigok. Huenan di, suminegaw sa langun etaw eg-ugpà diyà tanà. ⁶Migbael Datù Nemula i sa dalesan di dutu siedò langit tigtu mehagtaw, owoy igtagù di daa sa langit lagà sukub siini tanà.^x Kagdi sa egtipon sa wayeg kedu diyà dagat owoy egbuwahan di dema diyà tanà amuk eg-udan. Iya sa ngadan di si Datù Nemula.

⁷Mig-ikagi Datù Nemula i, guwaen di, “O medoo tegeIslaél, nesetepeng daa sa kehaa ku keniyu owoy sa medoo tegeSudan. Linaun ku kiyu kedu diyà sa tanà Igiptu, dodoo kinuwa ku ma sa medoo tegePilistiya kedu diyà sa tanà Kaptol’ owoy kinuwa ku ma sa medoo tegeSiliya kedu diyà sa tanà Kil. ⁸Taa yu, hih. Eghauwen ku doo kiyu i medoo tegeIslaél tegebael salà, owoy pedaetan ku ma doo kiyu anì mekedan yu diyà siini uwang tanà. Dodoo endà imeten ku duu pedaet sa langun tugod i Hakob. Aken si Datù Nemula sa eg-ikagi ini i.

⁹“Na, isugù ku ipesisig sa medoo tegeIslaél lagà sa teligo egsisigen anì mekedan sa medoo batu. Sisigen ku kagda ligò da eg-ugpà diyà sa langun balangan tanà, anì mekedan sa medoo etaw endà duen ulan. ¹⁰Meimet da mematay danà gila sa langun etaw ku tegebael salà, lapeg sa medoo etaw umikagi, guwaen da, ‘Endà ipetuu i Nemula duu sa kepigtamay di kenita.’ ”

Ini Sa Egoh I Nemula Umupion Sa Medoo TegeIslaél

¹¹Na, mig-ikagi Datù Nemula i, guwaen di, “Meuma doo sa agdaw egoh ku umupion sa kedatuan i Dabid, lagà sa sebaen dalesan nelukat. Upionen ku owoy pelumanan ku ma sa medoo kutà di. Baelan ku dulì anì mebaluy éhê sa palas di mendaa egoh anay. ¹²Huenan di, tabanan dema sa medoo tegeIslaél sa nesamà diyà sa tanà Idom owoy sa langun liyu balangan tanà kenà ku migpetaban kenagda egoh anay. Aken si Datù Nemula sa eg-ikagi ini i owoy ipetuu ku doo.

¹³“Na, meuma doo sa agdaw egoh sa tanà tigtu mebaluyan. Tapay da doo pelà kumetu apiya di pa meuma dé sa sasang kedadu. Owoy endà pa

^x **9:6** Mebaluy ma guwaen di, “Dutu langit dò sa medoo mehagtaw logsud sa dalesan i Datù Nemula, dodoo diyà tanà sa kenà di migpetigdeg.” ^y **9:7** Iya ma sa kepengadan da sa tanà Kaptol sa tanà Kelita.

meubus sa kehemeg da sa muna melegà bunga palas anì mael da wain, agulé melegà dema sa mekesetugdug bunga palas. Tumegùtù sa meemis wain diyà sa medoo bunga palas diyà sa medoo tuduk owoy dumelug ma diyà sa langun getan. Aken si Datù Nemula sa eg-ikagi ini i. ¹⁴Uwiten ku pelikù sa medoo etaw ku tegeIslaél diyà sa hagda tanà. Agulé dulien da mael sa medoo menuwa nedaetan anì umugpà da dema dahiya. Humemula da dema sa medoo inay palas owoy uminem da ma sa wain di. Humemula da sa medoo balangan pinangalap owoy mekaen da ma sa bunga sa langun hinemula da. ¹⁵Peugpaen ku dema sa medoo etaw ku diyà sa hagda munoy tanà, owoy endà dé duen sa mekehemaga kenagda diyà sa tanà igbegay ku diyà kenagda. Aken si Datù Nemula sa Nemula yu eg-ikagi ini i.”